

BERITA ONLINE

ASTRO AWANI

TARIKH: 25 SEPTEMBER 2022 (AHAD)



Lebih 4,000 usahawan muda dapat manfaat program MYStartup

Bernama
September 25, 2022 18:25 MYT



Ahmad Amzad berkata jumlah itu hampir mencapai 5,000 sasaran usahawan dalam tempoh tiga tahun yang ditetapkan kementerian itu. - Gambar fail

KUALA TERENGGANU: Seramai 4,304 usahawan di seluruh negara telah mendapat manfaat daripada program MYStartup anjuran Kementerian Sains, Teknologi dan Inovasi (MOSTI).

Timbalan Menteri Sains, Teknologi dan Inovasi Datuk Ahmad Amzad Hashim berkata jumlah itu hampir mencapai 5,000 sasaran usahawan dalam tempoh tiga tahun yang ditetapkan kementerian itu.

Beliau berkata lebih membanggakan, 80 peratus daripada usahawan tersebut terdiri daripada golongan muda yang sangat kreatif, inovatif dan energetik dalam membina perniagaan berasaskan sains dan teknologi.

"Amat mengagumkan apabila 80 peratus peserta MYStartup yang ada adalah golongan muda yang sangat dedikasi dan komited dalam mengusahakan produk berasaskan teknologi mereka.

"Kalau kita (MOSTI) tak bantu, usaha mereka akan jadi sia-sia. Justeru, MOSTI akan pastikan mereka mendapat sokongan yang cukup bukan sahaja dari segi dana, malah bimbingan-bimbingan lain," katanya selepas majlis perasmian 'MYStartup East Coast Region Roadshow' Terengganu di sini hari ini.

Turut hadir Pengerusi Jawatankuasa Pelancongan, Kebudayaan dan Teknologi Digital negeri Ariffin Deraman.

Program MYStartup yang dilancarkan pada 23 Feb lepas bertujuan membimbing usahawan secara menyeluruh bermula daripada peringkat penciptaan idea, kemudian dilatih dan disokong melalui pembiayaan serta diberikan peluang untuk mengetengahkan profil syarikat mereka di dalam platform laman web MYStartup.

Ahmad Amzad berkata produk usahawan MYStartup telah mendapat perhatian daripada hampir 3,000 pelabur luar negara termasuk Singapura, India, United Kingdom dan China yang berminat untuk menjalin kerjasama.

"Pelabur tertarik dengan produk dan idea usahawan MYStartup yang menarik untuk dikomersialkan.

"Justeru, MOSTI melalui ejen pelaksana, Cradle Fund Sdn Bhd akan berusaha untuk menghubungkan pelabur dan usahawan bagi menembusi pasaran," katanya.

-- BERNAMA